

摘藻堂四庫全書薈要

史部

欽定四庫全書薈要

史部  
通志卷十五上



詳校官員外郎臣楊世綸

欽定四庫全書薈要卷八千九百十三

史部

通志卷十五上

宋 右 迪 功 郎 鄭 樵 漁 仲 撰

後魏紀第十五上

聖武帝 神元帝 思帝 昭帝 桓帝 穆帝 平文帝

惠帝 煬帝 烈帝 昭成帝 道武帝 明元

帝 太武帝 文成帝 獻文帝

魏之先出自黃帝軒轅氏黃帝子曰昌意昌意之少子

受封北國有大鮮卑山因以為號其後世為君長統幽都之北廣漠之野畜牧遷徙射獵為業淳樸為俗簡易為化不為文字刻木結繩而已時事遠近人相傳授如史官之紀錄焉黃帝以土德王北俗謂土為拓謂后為跋故以為氏其裔始均仕堯時逐女魃於弱水北人賴其勲舜命為田祖歷三代至秦漢獯鬻獫狁山戎匈奴之屬累代作害中州而始均之裔不交南夏是以載籍無聞積六七十代至成皇帝諱毛立統國三十六大姓

九十九威振北方成帝崩節皇帝貸立節帝崩莊皇帝  
觀立莊帝崩明皇帝樓立明帝崩安皇帝越立安帝崩  
宣皇帝推寅立宣帝南遷大澤方千餘里厥土昏冥沮  
洳謀更南徙未行而崩景皇帝利立景帝崩元皇帝俟  
立元帝崩和皇帝肆立和帝崩定皇帝機立定帝崩僖  
皇帝蓋立僖帝崩威皇帝澮立威帝崩獻皇帝鄰立時  
有神人言此土荒遐宜徙建都邑獻帝年老乃以位授  
子聖武皇帝命南移山谷高深九難八阻於是欲止有

神獸似馬其聲類牛導引歷年乃出始居匈奴故地其  
遷徙策畧多出宣獻二帝故時人並號曰推寅蓋俗云  
鑽研之義

聖武皇帝諱詰汾嘗田於山澤欵見輜輶自天而下既  
至見美婦人自稱天女受命相偶旦日請還期年周時  
復會于此言終而別及碁帝至先田處果見天女以所  
生男授帝曰此君之子也當世為帝王語訖而去即始  
祖神元皇帝也故時人諺曰詰汾皇帝無婦家力微皇

帝無舅家帝崩神元皇帝立

神元皇帝諱力微元年歲在庚子先是西部內侵依於  
沒鹿迴部大人竇賓神元有雄傑之度後與賓攻西部  
賓軍敗失馬步走神元使以所乘駿馬給之賓歸求馬  
主帝隱而不言賓後知大驚將分國之半奉帝帝不受  
乃進其愛女賓猶思報恩乃從帝所欲徙所部北居長  
川積數年舊部人咸來歸附及賓臨終戒其二子使謹  
奉神元其子不從乃陰謀逆帝召殺之盡并其衆諸部

大人悉服控弦之士二十餘萬三十九年遷於定襄之  
盛樂四月祭天諸部君長皆來助祭唯白部大人觀望  
不至徵而戮之遠近肅然帝乃告諸大人為與魏和親  
計四十二年遣子文帝如魏且觀風土是歲魏景元二  
年也文帝諱沙漠汗以國太子留洛陽後文帝以神元  
春秋已高求歸晉武帝具禮護送五十六年文帝復如  
晉其冬還國晉征北將軍衛瓘以文帝雄異恐為後患  
請留不遣復請以金錦賂國之大人令致間隙五十八



年方遣帝神元使諸部大人詣陰館迎帝酒酣帝仰視  
飛鳥飛丸落之時國俗無彈衆大驚相謂曰太子被服  
同南夏兼竒術絕人若繼國統變易舊俗吾等必不得  
志乃謀危害帝並先馳還曰太子引空弓而落飛鳥似  
得晉人異法自帝在晉後諸子愛寵神元頗有所惑及  
聞諸大人請因曰當便除之於是諸大人馳詣塞南矯  
害帝其年神元不豫烏丸王庫賢親近任勢先受衛瑾  
之貨欲沮動諸部因於庭中礪鉞謂諸大人曰上恨汝

曹讒殺太子欲盡收諸大人長子殺之大人皆信各各散走神元尋崩凡饗國五十八年年一百四歲道武即位尊為始祖子章皇帝悉鹿立時諸部離散帝九年而崩弟平皇帝綽立七年而崩文帝少子思皇帝立

思皇帝諱弗政宗寬簡百姓懷服一年而崩

昭皇帝諱祿官神元帝之子也帝立九年分國為三部一居上谷北濡源西東接宇文部自統之一居代郡之參合陂北使文帝長子桓帝諱猗也統之一居定襄之

盛樂故城使桓帝弟穆帝猗盧統之自神元以來與晉  
和好是歲穆帝始出并州遷雜胡北徙雲中五原朔方  
又西度河擊匈奴烏丸諸部自杏城以北八十里迄長  
城原夾道立碣與晉分界二年葬文帝及皇后封氏初  
思帝欲改葬未果而崩至是述成前意焉三年桓帝度  
漠北巡因西畧諸國凡積五歲諸部降附者三十餘國  
桓帝英傑魁岸馬不能勝常乘安車駕大牛牛角容一  
石帝曾中蠱嘔吐之地仍生榆參合陂土無榆故時人

異之十年匈奴別種劉淵反晉於離石自號漢王并州  
刺史司馬騰來乞師桓帝與帝大舉以助之大破淵衆  
於西河上黨桓帝與騰盟於汾東而還乃使輔相衛雄  
段繁於參合陂西累石為亭樹碑以紀行焉十一年晉  
假桓帝大單于金印紫綬是歲桓帝崩桓帝統部凡十  
一年後定襄侯衛操樹碑於大邦城以頌功德子普根  
代立十三年昭帝崩穆帝總攝三部為一統帝天姿英  
峙勇畧過人元年劉淵僭帝號自稱大漢三年晉并州

刺史劉琨遣子導為質乞師帝使弟子平文皇帝助琨  
破白部大人次攻鐵弗劉虎晉懷帝進帝大單于封代  
公帝以封邑去國縣遠從琨求句注陁北地琨大喜乃  
徙馬邑陰館樓煩繁峙崞五縣人於陁南更立城邑盡  
獻其地東接代郡西連西河朔方數百里帝乃徙十萬  
家以充之六年城盛樂以為北都修故平城以為南都  
帝登平城西山觀望地勢乃更南百里於灑水之陽黃  
瓜堆築新平城晉人謂之小平城使子六修鎮之統領

南部八年晉愍帝進帝為代王置官屬食代常山二郡  
先是國俗寬簡至是明刑峻法諸部人多以違命得罪  
凡後期者皆舉部戮之或有室家相攜悉赴死所人問  
何之曰當就誅其威嚴若此九年帝召六修不至怒討  
之失利遂崩普根先守外境問難來攻六修滅之普根  
立月餘薨普根子始生桓帝后立之又薨思帝子平文  
皇帝立

平文皇帝諱鬱律姿質雄壯甚有威畧元年歲在丁丑

二年劉虎據朔方來侵西部帝大破之西兼烏孫故地  
東吞勿吉以西控弦士馬將百萬是歲晉元帝即位於  
江南劉曜僭帝位帝聞晉愍帝為曜所害顧謂大臣曰  
今中原無主天其資我乎曜遣使請和帝不納三年石  
勒自稱趙王遣使乞和請為兄弟帝斬其使以絕之五  
年晉元帝遣使韓暢加崇爵服帝絕之講武有平南夏  
志桓帝后以帝得衆心恐不利己子害帝遂崩大人死  
者數十人天興初追尊曰太祖

惠皇帝諱賀儻桓帝中子也以五年為元年帝未親政  
事太后臨朝遣使與石勒通和時人謂之女國使四年  
帝始臨朝以諸部人情未悉欵順乃築城於東木根山  
徙都之五年帝崩

煬皇帝諱紇那惠帝之弟也以五年為元年三年石勒  
遣石虎寇邊部帝禦之不利遷於大寧時平文帝長子  
烈帝居於舅賀蘭部帝遣使求之賀蘭部帥諂頭擁護  
不遣帝怒召宇文部并力擊諂頭宇文衆敗帝遷大寧



五年帝出居於宇文部賀蘭及諸部大人共立烈帝

烈皇帝諱翳槐以五年為元年石勒遣使求和帝遣弟昭成帝如襄國徙者五千餘家七年藹頭不修臣職召而戮之國人復貳於是煬帝自宇文部還入諸部大人復奉之煬帝以烈帝七年為後元年時烈帝出居於鄴三年石虎納烈帝於大寧國人六千餘家部落叛煬帝出居於慕容部烈帝復立以煬帝三年為後元年城盛樂城在故城東南十里一年而崩弟昭成皇帝立

昭成皇帝諱什翼犍平文皇帝之次子也生而奇偉寬仁大度身長八尺隆準龍顏立髮委地卧則乳垂至席烈帝臨崩顧命迎帝曰立此人則社稷乃安故帝弟孤自詣鄴奉迎與帝俱還十一月即位於繁峙北始稱建國元年時年十九

二年春始置百官分掌衆職東自濊貊西及破落那莫不款附五月朝諸大人於參合陂議定都溫源川連日不決乃從太后計而止聘慕容皝妹為皇后

三年春移都雲中之盛樂宮

四年築盛樂城於故城南八里皇后慕容氏崩十月劉  
虎寇西境帝遣軍大破之虎死子務桓立始來歸順帝  
以女妻之

五年五月幸參合陂七月七日諸部畢集設壇埒講武  
騎射因以為常八月還雲中

七年二月遣大人長孫秩迎后慕容氏於和龍旣送女  
於境七月慕容皝遣使來聘求交婚帝許之以烈帝女

妻焉

十四年帝以中州紛梗將親率六軍乘石氏之亂廓定中原諸大人諫乃止

十八年太后王氏崩

十九年正月劉務桓死其弟闕頭立潛謀反

二十一年闕頭部人多叛懼而東走度河半濟而冰陷後衆盡歸其兒子悉勿祈初闕頭之叛悉勿祈兄弟十二人在帝左右盡遣之歸欲其自相猜離至是悉勿祈

奪其衆闕頭窮而歸命帝待之如初

二十二年春帝東巡桑乾川四月悉勿祈死弟衛辰立  
二十三年六月皇后慕容氏崩七月衛辰來會葬因求  
婚許之

二十五年帝南巡君子津

二十八年正月衛辰謀反度河東帝討之衛辰懼遁走  
三十年十月帝征衛辰時河冰未成帝乃以葦絙約澌  
俄然冰合乃散葦於上冰草相結若浮橋然衆軍利涉

衛辰與宗族西走收其部落而還

三十四年春長孫斤謀反伏誅斤之反也拔刃向御坐太子實格之傷脇五月薨後追諡焉是為獻明皇帝七月皇孫珪生大赦

三十九年秦王苻堅遣其大司馬苻洛帥衆二十萬及其將朱彤張蚝鄧羌等諸道來寇王師不利帝時不豫乃率國人避於陰山之北高車雜種盡叛四面寇鈔不得芻牧復度漠南堅軍稍退乃還十二月至雲中旬有

二日皇子實君作亂帝暴崩時年五十七道武即位尊  
曰高祖帝性寬厚時國少繒帛代人許謙盜絹二疋守  
者以告帝匿之謂燕鳳曰吾不忍視謙之面卿勿洩之  
謙或慙而自殺為財辱士非也帝嘗擊西部叛賊流矢  
中目賊破後諸大臣見執射者各持錐刀欲屠割之帝  
曰各為其主何罪也釋之其仁恕若此

太祖道武皇帝諱珪昭成皇帝之嫡孫獻明帝之子也  
母曰獻明賀皇后初后因遷徙游於雲澤寢夢日出室

內寤而見光自牖屬天歟然有感以建國三十四年七月七日生帝於參合陂北其夜復有光明昭成大悅羣臣稱慶大赦告于祖宗保母以帝體重倍於常兒竊獨奇怪明年有榆生於藏胞之坎後遂成林帝弱而能言目有光曜廣顙大耳六歲而昭成崩苻堅遣將內侮將遷帝長安顙燕鳳乃免堅軍既還國衆離散堅使劉庫仁劉衛辰分攝國事南部大人長孫嵩及元他等盡將故人衆南依庫仁帝於是轉在獨孤部



元年葬昭成皇帝於金陵營梓宮木柿盡生成林帝雖  
冲幼而嶷然不羣劉庫仁常謂其子曰帝有高天下之  
志必興復洪業

七年十月晉敗苻堅于淮南慕容文等殺劉庫仁弟眷  
代攝國部

八年燕慕容暉弟冲僭立苻堅將姚萇自稱大單于萬  
年秦王慕容垂僭稱燕王

九年劉庫仁子顯殺眷而代之乃將謀逆商人王霸知

之履帝足於衆中帝乃馳還是時故大人梁盆子六眷  
為顯謀主盡知其計密使部人穆崇馳告帝乃陰結舊  
臣長孫健元他等因幸賀蘭部其日顯果使人殺帝不  
及語在獻明太后傳是歲乞伏國仁私署秦河二州牧  
大單于姚萇殺苻堅堅子丕僭即皇帝位於晉陽

登國元年春正月戊申帝即代王位郊天建元大會於  
牛川復以長孫嵩為南部大人以叔孫普洛為北部大  
人是月慕容垂僭即皇帝位於中山國號燕二月幸定

襄之盛樂息衆課農慕容冲為其部下所殺夏四月改稱魏王五月姚萇僭即皇帝位於長安國號大秦秋八月劉顯遣弟亢泥迎皇叔父窟咄于慕容永以兵隨之來逼南境帝左右于桓等與諸部大人謀應之事洩誅造謀者五人餘悉不問帝慮內難乃北踰陰山幸賀蘭部阻山為固遣行人安同長孫賀徵師于慕容垂垂令其子賀麟率師隨同等軍未至而寇逼於是北部大人叔孫普洛等十三人及諸烏丸亡奔衛辰帝自弩山幸

牛川屯于延水南出代谷會賀麟於高柳大破窟咄悉  
收其衆冬十月苻丕為晉將馮該所殺慕容永僭即皇  
帝位於長子十一月苻登僭即皇帝位於隴東十二月  
慕容垂遣使奉帝西單于印綬封上谷王帝不納

二年夏五月遣行人安同徵兵於慕容垂垂遣子賀麟  
率衆來會六月帝親征劉顯顯奔慕容永盡收其部落  
冬十二月巡松漠還幸牛川

三年夏五月癸亥北征庫莫奚大破之六月乞伏國仁

死其弟乾歸立私署河南王秋七月庫莫奚部帥鳩集遺散夜犯行宮縱騎撲討盡滅之八月使九原公儀於慕容垂冬十月垂遣使朝貢

四年春正月甲寅襲高車諸部落二月癸巳遂至女水討叱突隣部並大破之是月呂光自稱三河王夏五月使陳留公虔於慕容垂冬十月垂遣使朝貢

五年春三月甲申西征次鹿渾海襲高車袁紇部大破之慕容垂遣子賀麟來會夏四月丙寅行幸意辛山與

賀麟討賀蘭紇奚諸部落大破之秋八月還幸牛川使

秦王觚於慕容垂九月壬申討叱奴部囊曲水破之冬

十月討高車豆陳部於狼山破之十二月帝還次白漠

六年春正月幸紐埵川三月遣九原公儀陳留公虔等

西討黠弗部大破之夏四月祭天秋七月壬申講武于

牛川慕容垂止秦王觚而求名馬帝絕之乃遣使於慕

容永永使其大鴻臚慕容鈞奉表勸進尊號九月帝襲

五原屠之收其積穀還紐埵川於柰陽塞北樹碑紀功

冬十月戊戌北征蠕蠕追破之於大磧南商山下十一月戊辰還幸紐埵川戊寅衛辰遣子直力鞬寇南部壬午帝大破之於鐵岐山南衛辰父子奔遯十二月滅之衛辰少子屈丐亡奔薛干部自河以南諸部悉平收衛辰子弟宗黨無少長五千餘人盡殺之是歲起河南宮七年春正月辛未根山遂次黑鹽池饗羣臣北之美水三月還幸河南宮秋七月行幸漠南仍築巡臺冬十二月慕容永遣使朝貢

八年春正月南巡二月幸殺羊原赴白樓夏六月北巡  
秋七月臨幸新壇先是衛辰子屈丐奔薛干部徵之不  
送八月帝南征薛干部屠其城九月還幸河南宮

九年春三月北巡使東平公儀屯田於河北五原至於  
相陽塞外夏五月田於河東秋七月還幸河南宮冬十  
月蠕蠕杜崙等率部落西走是歲姚萇子興僭位殺苻  
登慕容垂滅永

十年秋七月慕容垂遣其子寶來寇五原八月帝親兵



於河南冬十月辛未寶燒船夜遁己卯帝進軍濟河乙酉夕至參合陂丙戌大破之禽其王公以下文武將吏數千人於俘虜中擢其才識者賈彞賈閏鼂崇等參謀議憲章故實十二月還幸雲中之盛樂

皇始元年春正月大蒐于定襄因東幸善無北陂三月慕容垂寇桑乾川陳留公虔死之垂遂至平城西北聞帝將至乃築城自守疾甚遂遁死於上谷子寶祕喪還至中山乃僭立夏六月丁亥皇太后賀氏崩是月葬獻

明太后呂光僭稱天王國號涼秋七月左司馬許謙上書勸進尊號於是改元始建天子旌旗出警入蹕八月己亥大舉討慕容寶帝親勒六軍四十餘萬南出馬邑踰句注旌旗絡繹二千餘里鼓行而前人屋皆震別詔將軍封真等從東道襲幽州圍薊九月戊午次陽曲乘西山臨觀晉陽寶并州牧遼西王農棄城遁并州平初建臺省置百官封拜公侯將軍刺史太守尚書郎以下悉用文人帝初拓中原留心慰納諸士大夫詣軍門者

無少長皆引入人得盡言苟有微能咸蒙叙用己未詔  
輔國將軍奚牧畧地晉川獲慕容寶丹陽王買得等於  
平陶城九月晉孝武帝殂冬十一月庚子朔帝至真定  
自常山以東守宰或捐城奔竄或稽顙軍門唯中山鄴  
信都三城不下別詔東平公儀攻鄴冠軍將軍王建左  
軍將軍李粟等攻信都詔軍行不得傷桑棗戊午進軍  
中山己未圍之帝曰朕量寶不能出戰必憑城自守急  
攻則傷士卒久守則費糧不如先平鄴信都然後還取

中山諸將稱善丁卯車駕幸魯口城

二年春正月壬戌帝引騎圍信都其夜寶冀州刺史宜都王慕容鳳踰城奔中山癸亥寶輔國將軍張驥護軍將軍徐超舉城降是月鮮卑禿髮烏孤私署大單于西平王二月丁丑帝軍于鉅鹿之栢肆塢臨滹池水其夜寶悉衆犯營燎及行宮兵人駭散帝驚起不及衣冠跣出擊鼓俄而左右及中軍將士稍集帝設奇陣列烽營外縱騎衝之寶衆大敗走還中山獲其器械數十萬計

寶尚書閔亮祕書監崔逞等降者相屬賜拜職爵各有  
差三月己酉車駕次盧奴寶求和請送秦王觚割常山  
以西奉魏乞守中山以東帝許之已而寶背約辛亥車  
駕次中山命將圍之是夜寶弟賀麟將妻子走西山寶  
恐賀麟先據和龍壬子夜北遁城內共立慕容普隣為  
王夏四月帝以軍糧不繼詔東平公儀罷鄴圍徙屯鉅  
鹿五月庚子帝以中山城內為普隣所脅乃招喻之甲  
辰曜兵揚威以示城內命諸軍罷圍南徙以待其變甲

寅以東平公儀為左丞相封衛王進襄城公題爵為王  
秋七月普隣遣烏丸張驤率五千餘人出城求食寇靈  
壽賀麟自丁零中入驤軍因其衆復入中山殺普隣而  
自立八月丙寅朔帝進軍九門時大疫人馬牛死者十  
五六中山猶拒守羣下咸思北還帝知之謂曰斯固天  
命將若之何四海之人皆可與為國在吾所以撫之耳  
何恤乎無人羣臣乃不敢言九月賀麟飢窮率三萬餘  
人寇新市甲子晦帝進軍討之太史令鼂崇奏曰不吉

帝曰何也對曰紂以甲子亡兵家忌之帝曰周武不以  
甲子勝乎崇無以對冬十月丙寅帝進軍新市賀麟退  
阻泝水依漸洳澤以自固甲戌帝臨其營戰於義臺塢  
大破之賀麟單馬走鄴慕容德殺之甲申賀麟所署公  
卿尚書將吏士卒降者二萬餘人其將張驤李沈慕容  
文等先來降尋皆亡還是日復獲之皆赦而不問獲所  
傳皇帝璽綬圖書府庫珍寶中山平乙酉襄城王題薨  
天興元年春正月慕容德走保滑臺衛王儀尅鄴庚子

行幸真定駕遂幸鄴百姓有老病不能自存者詔郡縣  
振卹之帝至鄴巡登臺榭徧覽宮城將有定都之志乃  
置行臺遂還中山所過存問百姓詔大軍所經州郡皆  
復貲租一年除山東人租賦之半車駕將北還發卒萬  
人通直道自望都鐵關鑿恒嶺至代五百餘里帝慮還  
後山東有變乃於中山置行臺詔衛王儀鎮之使畧陽  
公遵鎮勃海之合口右軍將軍尹國先督租于冀州聞  
帝將還謀反欲襲信都安南將軍長孫嵩執送斬之卒



西車駕發中山至于望都堯山徙山東六州人吏及徒  
河高麗新夷三十六署百工伎巧十餘萬口以充京師  
車駕次于恒山之陽博陵勃海章武諸郡羣盜並起畧  
陽公遵等討之是月慕容德自稱燕王據廣固二月車  
駕至自中山幸繁峙宮更選屯衛詔給內徙新戶耕牛  
計口受田三月徵左丞相衛王儀還京師詔畧陽公遵  
代鎮中山夏四月壬戌以歷陽公穆崇為太尉鉅鹿公  
長孫嵩為司徒進封畧陽公遵為常山王南安公順為

毗陵王祭天於西郊旗幟有加焉廣平太守遼西公意  
列謀反與郡人韓奇矯假讖圖將襲鄴城詔反者就郡  
賜死是月蘭汗殺慕容寶而自立為大單于昌黎王六  
月丙子詔有司議定國號羣臣奏曰昔周秦以前帝王  
居所生之土及王天下即承為號今國家啟基雲代應  
以代為號詔曰昔朕遠祖總御幽都控制遐國雖踐王  
位未定九州逮于朕躬掃平中土凶逆蕩除遐邇率服  
宜仍先號為魏秋七月遷都平城始營宮室建宗廟立

社稷慕容寶子盛殺蘭汗而自立為長樂王八月詔有  
司正封畿制郊甸端徑術擿道里平五權較五量定五  
度遣使循行郡國舉奏守宰不法者親覽察黜陟之冬  
十月起天文殿十一月辛亥尚書吏部郎中鄧彥海典  
官制正爵品定律呂協音樂儀曹郎中董謚撰郊廟社  
稷朝覲饗宴之儀三公郎中王德定律令申科禁太史  
令鼂崇造渾儀考天象吏部尚書崔宏總裁之閏月左  
丞相衛王儀及王公卿士詣闕上書曰臣等聞宸極居

中則列宿齊其晷帝王順天則羣后仰其度伏惟陛下  
德協二儀道隆三五仁風被于四海盛化塞于天區澤  
及昆蟲恩霑行葦謳歌所屬八表歸心而躬履謙虛退  
身後已宸儀未彰袞服未御非所以上允皇天之意下  
副樂推之心臣等謹昧死以聞帝三讓乃許之十二月  
己丑帝臨天文殿大尉司徒進璽綬百官咸稱萬歲大  
赦改元追尊成帝以下及后號諡樂用皇始之舞詔百  
司議定行次尚書崔宏等奏從土德服色尚黃數用五

祖以未臘以辰犧牲用白五郊立氣宣贊時令敬授人  
時行夏之正徙六州二十二郡守宰豪傑吏人二千家  
于代都

二年春正月甲子初祀上帝于南郊以始祖神元皇帝  
配降壇視燎成禮而反乙丑赦京師始制三駕之法庚  
午北巡分命諸將大襲高車常山王遵三軍從東道出  
長川高原王樂真等七軍從西道出牛川車駕親勒六  
軍從中道自駮髯水西北出二月丁亥朔諸軍同會破

高車雜種三十餘部衛王儀督三將別從西北絕漠千餘里破其遺迸七部還次牛川及薄山並刻石紀功以所獲高車衆起鹿苑於南臺陰北距長城東苞白登屬之西山廣輪數十里鑿渠引武川水注之苑中疏為三溝分流宮城內外又穿鴻鴈池三月己未車駕至自北伐甲子初令五經羣書各置博士增國子太學生員三千人是月氏人李辯叛慕容德求援於鄴行臺尚書和跋以輕騎應之尅滑臺收德宮人府藏秋七月起天華

殿辛酉大閱于鹿苑八月增啟京城十二門作西武庫  
除州郡人租賦之半辛亥詔禮官備撰衆儀著于新令  
范陽人盧溥聚衆海濱稱幽州刺史攻掠郡縣殺幽州  
刺史封沓于是月禿髮烏孤死其弟利鹿孤立遣使朝  
貢冬十月太廟成遷神元平文昭成獻明皇帝神主于  
太廟十二月天華殿成呂光立其子紹為天王自稱太  
上皇及死庶子纂殺紹而僭立

三年春正月戊午材官將軍和突破盧溥於遼西獲之

及其子煥傳送京師輟之癸亥祀北郊分命諸官循行  
州郡觀風俗察舉不法二月丁亥詔有司祀日于東郊  
始耕籍田壬寅皇子聰薨三月戊午立皇后慕容氏是  
月穿城南渠通於城內作東西魚池夏四月姚興遣使  
朝貢五月戊辰詔謁者僕射張濟使於姚興己巳東巡  
遂幸涿鹿遣使者以太牢祀帝堯帝舜廟西幸馬邑觀  
灑源六月庚辰朔日有蝕之秋七月乞伏乾歸大為姚  
興所破壬子車駕還宮起中天殿及雲母堂金華室時



太史屢奏天文錯亂帝親覽經占多云宜改王易政於是數革官號欲以防塞凶狡消弭災變已而慮臣下疑惑冬十二月丙申下詔述成敗之理鑒殷周之失革秦漢之弊以喻臣下是歲河右諸郡奉李嵩為秦涼二州牧涼公

四年春二月丁亥命樂師入學習儻釋菜于先聖先師丁酉分命使者巡幸州郡聽察辭訟糾劾不法是月呂光弟子隆弒呂纂而自立三月帝親漁薦于寢廟夏四

月辛卯罷鄴行臺詔有司明揚隱逸五月起紫極殿元  
武樓涼風觀石池鹿苑臺六月盧水胡沮渠蒙遜私署  
涼州牧張掖公秋七月詔兗州刺史長孫肥南徇許昌  
彭城詔賜天下鎮戍將士布帛各有差八月段興殺慕容  
盛盛叔父熙盡誅段氏僭即皇帝位冬十二月集博  
士儒生比衆經文字義類相從凡四萬餘字號曰衆文  
經是歲涼李騫沮渠蒙遜並遣使朝貢

五年春正月帝聞姚興將寇邊庚寅大簡輿徒詔并州

諸軍積穀于平陽乾壁三月禿髮利鹿孤死夏五月姚  
興遣其弟義陽王平來侵平陽攻陷乾壁秋七月戊辰  
朔車駕西討八月乙巳至乾壁平固守進軍圍之姚興  
悉舉其衆來救甲子帝度蒙坑逆擊興軍大破之冬十  
月平赴水而死俘其餘衆三萬餘人獲興尚書左僕射  
狄伯支以下四品將軍以上四十餘人獲前亡臣王次  
多勒勒並斬以徇興頻使請和帝不許羣臣請進平蒲  
坂帝慮蠕蠕為難戊申班師十一月車駕次晉陽徵相

州刺史庾岳為司空十二月辛亥至自西征越勒莫弗率其部萬餘家內屬

六年春正月辛未朔方尉遲部別帥率萬家內屬入居雲中夏四月癸巳朔日有蝕之五月大簡輿徒將畧江淮秋七月鎮西大將軍司隸校尉毗陵王順有罪以王還第戊子北巡築離宮于豺山縱士校獵東北踰罽嶺出參合代谷九月行幸南平城規度灑南夏屋山背黃瓜堆將建新邑辛未車駕還宮冬十月起西昭陽殿乙

卯立皇子嗣為齊王加車騎大將軍位相國紹為清河王加征南大將軍熙為陽平王曜為河南王封故秦愍王子夔為豫章王陳留桓王子悅為朱提王丁巳晉人來聘十一月庚午將軍伊謂大破高車十二月晉桓元廢其主司馬德宗為平固王而自立僭號楚

天賜元年春二月晉劉裕起兵誅桓元三月初限縣戶不滿百罷之夏五月置山東諸治發州郡徒謫造兵甲秋九月帝臨昭陽殿分置衆職引朝臣文武親自簡擢

量能叙用制爵四等曰王公侯子除伯男之號追錄舊臣加封爵各有差是秋江南大亂流人襁負奔淮北者行道相尋冬十月辛巳大赦改元築西宮十一月幸西宮大選臣寮令各辯宗黨保舉才行諸部子孫失業賜爵者二千餘人

二年春正月晉主司馬德宗復位夏四月祀西郊車旗盡黑冬十月慕容德死

三年春正月甲申北巡幸豺山宮校獵還至屈孤山二

月乙亥幸代園山建五石亭三月庚子車駕還宮夏四月庚申復幸豺山宮占授著作郎王宜弟造兵法孤虛立成圖三百六十時遂登定襄角史山又幸馬城甲戌車駕還宮六月發八部五百里內男丁築灑南宮門闕高十餘丈引溝穿池廣苑圍規立外城方二十里分置市里經途洞達三十日罷秋七月太尉穆崇薨八月甲辰行幸豺山宮遂至青牛山丙辰西登武要北原觀九十九泉造石亭遂之石漠九月甲戌朔幸漠南鹽池壬

午至漠中觀天鹽池度漠北之吐鹽池癸巳南還長川  
丙申臨觀長陂冬十月庚申車駕還宮

四年春二月封皇子修為河間王處文為長樂王連為  
廣平王黎為京兆王夏五月北巡自參合陂東過蟠羊  
山大雨暴水流輜重數百乘殺百餘人遂東北踰石漠  
至長川幸濡源常山王遵有罪賜死六月赫連屈丐自  
稱大單于大夏天王秋七月西幸參合陂築北宮垣三  
旬而罷乃還宮慕容寶養子高雲殺慕容熙而自立僭



號天王八月誅司空庾岳

五年春正月行幸豺山宮遂如參合陂觀漁于延水至  
寧川三月姚興遣使朝貢秋七月戊戌朔日有蝕之冬  
十月禿髮傉檀僭即涼王位

六年夏帝不豫初帝服寒食散自太監令陰羌死後藥  
數動發至此愈甚而災變屢見憂懣不安或數日不食  
或不寢達旦歸咎羣下喜怒乖常謂百寮左右不可信  
慮如天文之占或有肘腋之虞追思既往成敗得失終

日竟夜獨語不止若傍有鬼物對揚者朝臣至前追其舊惡便見殺害其餘或以顏色變動或以喘息不調或以行步乖節或以言辭失措帝以為懷惡在心變見於外乃手自毆擊死者皆陳天安殿前於是朝野人情各懷危懼有司廢怠莫相督攝百工偷劫盜賊公行巷里之間人為稀少帝亦聞之曰朕故縱之使然幸過災年當更清整之耳秋七月慕容氏支屬百餘家謀欲外奔發覺伏誅死者三百餘人八月衛王儀謀叛賜死十月

戊辰清河王紹作亂帝崩於天安殿時年三十九永興  
二年九月甲寅上諡曰宣武皇帝葬於盛樂金陵廟號  
太祖泰恒五年改諡曰道武帝

道武九年始稱年號登國十年皇始二年天興六  
年天賜六年即位三十二年

太祖明元皇帝諱嗣道武皇帝之長子也母曰劉貴人  
登國七年生於雲中宮道武晚有男聞而大悅乃大赦  
帝明睿寬毅非禮不動天興六年封齊王拜相國初帝

母既賜死道武召帝告曰昔漢武將立其子而殺其母不令婦人與國政汝當繼續故吾還同漢武帝素純孝哀不自勝道武怒帝還宮哀不自止道武知而又召帝帝欲入左右諫請待和斛而進帝從之及元紹之逆帝還而誅之

永興元年冬十月壬午皇帝即位大赦改元追尊皇妣為宣穆皇后公卿大臣先罷歸第者悉復登用之詔南平公長孫嵩北新侯安同對理人訟簡賢任能是月馮

跋殺其主高雲僭號天王國號北燕閏十月丁亥朱提  
王悅謀反賜死詔都兵將軍山陽侯奚斤巡諸州問人  
疾苦十二月戊戌封衛王儀子良為南陽王進陰平公  
烈爵為王改封高涼王樂真為平陽王己亥帝始居西  
宮御天文殿蠕蠕犯塞是歲乞伏乾歸自稱秦王

二年春正月甲寅朔詔南平公長孫嵩等北征蠕蠕因  
留屯漠南夏五月嵩等自大漠還蠕蠕追圍之於牛川  
壬申帝北伐蠕蠕蠕聞而遁走車駕還幸參合陂六

月晉將劉裕滅慕容超秋七月丁巳立射臺於陂西仍講武乙丑至自北伐

三年春二月戊戌詔簡宮人非御及伎巧者悉以賜鰥人已亥詔北新侯安同等持節巡行并定二州及諸山居雜胡丁零問其疾苦察舉守宰不法者辛丑簡宮人工伎之不急者出賜人不能自存者三月己未詔侍臣常佩劔夏五月丙寅復出宮人賜鰥人辛卯車駕謁金陵於盛樂己巳昌黎王慕容伯兒謀反伏誅六月姚興

遣使朝貢秋七月戊申賜衛士酺三日冬十一月丁未  
大閱于東郊

四年春二月癸未登虎圈射猛虎夏四月乙未宴羣臣  
於西宮使各獻直言勿有所諱六月乞伏乾歸為兄子  
公府所弑閏月丙辰大閱于東郊秋七月己巳朔東巡  
置四廂大將又放十二時置十二小將以山陽侯奚斤  
元城公屈行左右丞相己卯大獮于石會山戊子臨去  
畿陂觀漁庚寅至於濡源西巡幸北部諸落八月壬子

幸西宮臨板殿大饗羣臣命百姓大酺三日乙卯賜王公以下至宿衛將士布帛有差冬十一月己丑賜宗室近屬南陽王良以下至於總麻親布帛各有差是月沮渠蒙遜僭稱西河王十二月丁巳北巡至長城而旋五年春正月己巳大閱畿內男年十二以上悉集己卯幸西宮頽拔大渠帥四十餘人詣闕奉貢賜以繒帛錦罽各有差乙酉詔諸州六十戶出戎馬一匹庚寅大閱于東郊署將帥以山陽侯奚斤為前軍衆三萬陽平王



熙等十二將各一萬騎帝臨白登躬自校覽二月庚戌  
幸高柳川癸丑穿魚池於北苑庚午姚興遣使朝貢己  
卯詔使者巡行天下招延雋彥搜揚隱逸夏四月乙卯  
西巡五月乙亥行幸雲中舊宮之大室丙子大赦六月  
西幸五原校獵于骨羅山獲獸十萬秋七月己巳還幸  
薄山帝登觀宣武游幸刻石頌德之處乃於其旁起石  
壇而薦饗焉賜從者大酺於山下前軍奚斤等破越勒  
倍泥部於跋那山西徙二萬餘家而旋丙戌車駕自大

室西南巡諸部落遂南次定襄大洛城東踰七嶺山田  
于善無川八月癸卯車駕還宮癸丑奚斤等班師甲寅  
帝臨白登山觀降人數軍實置新人於大窰給農器計  
口受田冬十一月癸酉大饗于西宮姚興遣使朝貢請  
進女帝許之

神瑞元年春正月辛酉以禎瑞頻集大赦改元辛巳行  
幸繁峙賜王公以下至于士卒百工布帛各有差二月  
戊戌車駕還宮乙卯起豐宮於平城東北夏六月乞伏

熾磐滅禿髮傳檀秋七月晉將朱齡石滅蜀八月戊子  
詔馬邑侯元陋孫使於姚興姚興遣使朝貢九月丁巳  
朔日有蝕之冬十一月壬午詔使者巡行諸州校閱守  
宰資財非自家所齎悉簿為贓守宰不如法聽百姓詣  
闕告之十二月丙戌朔蠕蠕犯塞丙申車駕北伐

二年春正月丙辰車駕至自北伐二月丁亥大饗于西  
宮甲辰立宣武廟于白登西三月丁丑詔以刺史守宰  
率多逋惰今年貲調縣違者謫出家財以充不聽徵發

於人夏四月晉人來聘己卯北巡五月丁亥次於參合

東幸大甯丁未田于四岬山六月戊午臨去畿陂觀漁

辛酉次于濡源立螾臺遂射白熊於顏牛山獲之丁卯

幸赤城親見長老問民疾苦復租一年南次石亭幸上

谷問百年訪賢雋復田租之半壬申幸涿鹿登嶠山觀

溫泉使以太牢祠黃帝唐堯廟癸酉幸廣甯事如上谷

己卯登廣甯之歷山以太牢祠舜廟帝親加禮焉庚辰

幸代秋七月癸未車駕還宮復所過田租之半八月庚

辰晦日有蝕之九月京師人飢聽就食山東冬十月壬子姚興使奉其西平公主至帝以后禮納之辛酉行幸沮洳城癸亥車駕還宮丙寅詔以頻遇霜旱年穀不登命出布帛倉穀以振貧窮

秦常元年春二月丁未姚興死三月己丑長樂王處文薨夏四月壬子大赦改元庚申河間王修薨五月甲申彗星二見六月丁巳北巡秋七月甲申大獮于牛川發釜山臨殷繁水南觀于九十九泉戊戌車駕還宮辛亥

晦日有蝕之九月晉劉裕溯河伐姚泓遣部將王仲德  
從陸道至梁城兗州刺史尉建畏懦棄守北渡仲德遂  
入滑臺詔將軍叔孫建等度河耀威斬尉建於城下冬  
十一月戊寅起蓬臺于北苑十二月南陽王良薨

二年春正月甲戌朔日有蝕之二月丙午詔使者巡行  
天下觀風俗問其所苦是月西涼李暠死五月西巡至  
雲中遂濟河田于大漠秋七月乙亥車駕還宮乙酉起  
白臺於城南高二十丈是月晉劉裕滅姚泓冬十月癸

丑豫章王夔夔十一月己酉詔河東河內購泓子弟播  
越人間者

三年春三月晉人來聘庚戌幸西宮以渤海范陽郡去  
年大水復其租稅夏四月己巳徙冀定幽三州徙河於  
京師五月壬子東巡至濡源及甘松遣征東將軍長孫  
道生帥師襲馮跋遂至龍城徙其居人萬餘家而還秋  
七月戊午車駕至京師八月鴈門河內大雨水復其租  
稅冬十月戊辰築宮於西苑十一月赫連屈丐尅長安

十二月晉安帝殂

四年春正月壬辰朔車駕臨河大蒐于犢渚癸卯還宮  
二月赫連屈丐僭即皇帝位癸丑築宮於蓬臺北夏四  
月庚辰享東廟遠蕃助祭者數百國辛巳南巡幸鴈門  
賜所過無出今年租賦五月庚寅朔觀漁于灑水己亥  
車駕還宮秋八月辛未東巡遣使祠恒岳甲申車駕還  
宮賜所過無出今年田租九月甲寅築宮於白登山冬  
十一月丁亥朔日有蝕之十二月癸亥西巡至雲中踰



白道北獵野馬於辱孤山至于黃河從君子津西度大  
狩於薛林山

五年春正月丙戌朔自薛林東還至屋竇城饗勞將士  
大酺二日班禽以賜之己亥車駕還宮三月丙戌南陽  
王意文薨夏四月丙寅起灑南宮五月乙酉詔曰宣武  
皇帝體得一之元遠應自然之冲妙大行大名未盡盛  
美今啟緯圖始覩尊號其更上尊諡曰道武皇帝以章  
靈命之先啟聖德之元同庚戌淮南侯司馬國璠池陽

侯司馬道賜等謀反伏誅六月丙寅幸翳犢山是月晉  
恭帝禪位于宋秋七月丁酉西至五原丁未幸雲中大  
室賜從者大酺八月癸亥車駕還宮閏月甲午陰平王  
烈薨是歲西涼亡

六年春二月己亥詔天下戶二十輸戎馬一匹大牛一  
頭三月甲子陽平王熙薨乙亥制六部人羊滿百口者  
調戎馬一匹發京師六千餘人築苑起自舊苑東苞白  
登周回四十餘里夏六月乙酉北巡至于蟠羊山秋七

月乙卯車駕還宮癸酉西巡獵于祚山親射猛獸獲之  
遂至于河八月庚子大獮于犢渚九月庚戌車駕還宮  
壬申宋人來聘冬十月己亥行幸代十二月丙申西巡  
于雲中

七年春正月甲辰朔自雲中西幸屋竇城賜從者大酺  
三日二月丙戌車駕還宮三月乙丑河南王曜薨夏四  
月甲戌封皇子燾為太平王拜相國加大將軍丕為樂  
平王加車騎大將軍彌為安定王加衛大將軍範為樂

安王加中軍大將軍健為永昌王加撫軍大將軍崇為  
建寧王加輔國大將軍俊為新興王加鎮軍大將軍獻  
懷長公主子稽敬為長樂王拜大司馬大將軍初帝服  
寒食散頻年發動不堪萬機五月立太平王燾為皇太  
子臨朝聽政是月宋武帝殂秋九月詔司空奚斤等帥  
師伐宋乙巳幸灑南宮遂如廣寧己酉詔皇太子率百  
國以法駕田于東苑車乘服物皆以乘輿之副辛亥築  
平城外郭周回三十二里辛酉幸嶠山遣使者祠黃帝

唐堯廟因東幸幽州見耆年問其所苦賜以爵號分遣使者巡行州郡觀察風俗冬十月甲戌車駕還宮復所過田租之半奚斤等濟河攻滑臺不拔求濟師帝怒不許議親南征為其聲援壬辰南巡出自天門關踰恒嶺四方蕃附大人各帥所部從者五萬餘人十一月皇太子親統六軍鎮塞上安定王彌與北新公安同居守丙午曲赦司州殊死以下丙辰次於中山問民疾苦十二月丙戌行幸冀州存問民俗遣壽光侯叔孫建等率衆

自平原東度狗下青兗諸郡

八年春正月丙辰行幸鄴存問風俗司空奚斤既平兗  
豫還圍虎牢宋守將毛德祖距守不下蠕蠕犯塞二月  
戊辰築長城於長川之南起自赤城西至五原延袤二  
千餘里備置戍衛三月乙卯濟自靈昌夏四月丁卯幸  
成臯觀虎牢而城內乏水縣綆汲河帝令連艦上施輶  
輻絕其汲路又穿地道以奪其井丁丑幸洛陽觀石經  
閏月丁未還幸河內北登太行幸高都已未虎牢潰士

衆大疫死者十二三辛酉幸晉陽班賜王公以下至於  
廝役五月丙寅還次鴈門皇太子率留臺王公迎于句  
注之北庚寅車駕至自南巡六月己亥太尉宜都公穆  
觀薨丙辰北巡至參合陂秋七月幸三會屋侯泉詔皇  
太子率百官以從八月幸馬邑觀于灑源九月乙亥車  
駕還宮冬十月癸卯廣西宮起外牆周回二十里是歲  
飢詔所在開倉振給十一月己巳帝崩於西宮時年三  
十二遺詔以司空奚斤所獲軍實賜大臣自司徒長孫

嵩以下至于士卒各有差十二月庚子上諡曰明元皇帝葬于雲中金陵廟稱太宗帝兼資文武禮愛儒生好覽史傳以劉向所撰新序說苑於經典正義多有所闕乃撰新集三十篇採諸經史該洽古義云

明元帝永興五年神瑞二年泰恒八年即位十五年

世祖太武皇帝諱燾明元皇帝之長子也母曰杜貴嬪天賜五年生於東宮體貌瓌異道武奇之曰成吾業者



必此兒也泰常七年四月封太平王五月立為皇太子  
及明元帝疾命帝總攝百揆帝聰明大度意豁如也八  
年十一月己巳明元帝崩壬申太子即皇帝位大赦天  
下十二月追尊皇妣為密皇太后進司徒長孫嵩爵為  
北平王司空奚斤為宜城王藍田公長孫翰為平陽王  
其餘普增爵位各有差於是除禁錮釋嫌疑開倉庫振  
窮乏河南流人相率內屬者甚衆

始光元年春正月丙寅安定王彌薨夏四月甲辰東巡

幸大甯六月宋徐羨之弑其主義符秋七月車駕還宮  
八月蠕蠕六萬騎入雲中殺略人吏攻陷盛樂帝帥輕  
騎討之虜乃退走九月大簡輿徒於東郊將北討冬十  
二月遣平陽王長孫翰等討蠕蠕車騎次祚山蠕蠕北  
遁諸軍追之大獲而還

二年春正月己卯車駕至自北伐三月丙辰尊保母竇  
氏曰保太后丁巳以北平王長孫嵩為太尉平陽王長  
孫翰為司徒宜城王奚斤為司空庚申營故東宮為萬

壽宮起永安安樂二殿臨望觀九華堂初造新宇千餘  
夏四月詔龍驤將軍步堆使宋五月詔天下十家發大  
牛一頭運粟塞上秋八月赫連屈丐死九月永安安樂  
二殿成丁卯大饗以落之冬十月癸卯車駕北伐東西  
五道並出平陽王長孫翰等絕漠追寇蠕蠕北走

三年春正月壬申車駕至自北伐乞伏熾磐遣使朝貢  
請討赫連昌二月起大學於城東祀孔子以顏回配夏  
五月辛卯進中山公纂爵為王復南安公素先爵常山

王六月幸雲中舊宮謁陵廟西至五原田於陰山東至和兜山秋七月築馬射臺于長川帝親登臺走馬王公諸國君長馳射中者賜金錦繒絮各有差八月車駕還宮宋人來聘帝以赫連屈丐死諸子相攻冬十月丁巳車駕西伐幸雲中臨君子津會天暴寒數日冰合十一月戊寅率輕騎襲赫連昌壬午徙萬餘家而還至祚山班虜獲以賜將士各有差十二月詔奚斤西據長安秦隴氏羌皆叛昌詣斤降武都王楊元及沮渠蒙遜等使

使內附

四年春正月乙酉車駕至自西伐賜留臺文武各有差  
從人在道多死到者裁十六七己亥行幸幽州赫連昌  
遣其弟定向長安帝聞之遣就陰山伐木造攻具二月  
車駕還宮三月丙午詔執金吾桓貸造橋於君子津丁  
丑廣平王連薨夏四月丁未詔員外散騎常侍步堆使  
於宋五月車駕西討赫連昌次拔隣山築城舍輜重以  
輕騎三萬先行戊戌至黑水帝親祈天告祖宗之靈而

誓衆六月癸卯朔日有蝕之甲辰大破赫連昌昌奔上  
邽乙巳車駕入城虜昌羣弟及其母妹妻妾宮人萬數  
府庫珍寶車旗器物不可勝計辛酉班師留常山王素  
執金吾桓貸鎮統萬秋七月己卯築壇於祚嶺戲馬馳  
射賜中者金帛繒絮各有差蠕蠕寇雲中聞破赫連昌  
懼而逃八月壬子車駕至自西伐飲至策勲告宗廟班  
軍實以賜留臺百寮各有差冬十一月以氐王楊元為  
假征南大將軍都督梁州刺史南秦王十二月行幸中

山守宰貪污免者十數人癸卯車駕還宮復所過田租之半

神麇元年春正月以天下守令多非法精選忠良悉代之辛未京兆王黎薨二月改元司空奚斤進軍安定監軍侍御史安頡出戰禽昌其餘衆立昌弟定為主走還平涼三月辛巳侍中古弼送赫連昌至于京師司空奚斤追赫連定於平涼馬髦嶺為定所禽將軍丘堆先在安定聞斤敗東走長安帝大怒詔頡令斬之夏四月赫

連定遣使朝貢壬子西巡戊午田於河西大赦南秦王  
楊元遣使朝貢五月乞伏熾磐死秋八月東幸廣甯臨  
觀溫泉以太牢祭黃帝堯舜廟九月車駕還宮冬十一  
月乙未朔日有蝕之是月行幸河西大校獵十二月甲  
申車駕還宮

二年夏四月宋人來聘庚寅車駕北伐五月丁未次于  
沙漠舍輜重輕騎兼冀馬至粟水蠕蠕震怖焚廬舍遁  
跡西走冬十月振旅凱旋于京師告于宗廟列置新人



于漠南東至濡源西暨五原陰山竟三千里十一月西  
巡田于河西至祚山而還

三年春正月庚子車駕還宮壬寅大赦癸卯行幸廣甯  
臨溫泉作溫泉歌二月丁卯司徒平陽王長孫翰薨戊  
辰車駕還宮三月壬寅進會稽公赫連昌為秦王夏四  
月甲子行幸雲中敕勒萬餘家叛走詔尚書封鐵追滅  
之五月戊午論討敕勒功大明賞罰秋七月己亥詔諸  
征鎮將軍王公仗節邊遠者聽開府辟召其次增設吏

員庚子詔大鴻臚卿杜超假節都督冀定相三州諸軍  
事行征南大將軍太宰進爵為王鎮鄴為諸軍節度八  
月宋將到彥之自清水入河沂流西行丙寅彥之遣將  
度河攻蒲坂冠軍將軍安頡督諸軍擊破之九月癸卯  
立密皇太后廟于鄴甲辰行幸統萬遂征平涼是月馮  
跋死冬十月乙卯冠軍將軍安頡濟河攻洛陽甲子拔  
之辛巳安頡平虎牢十一月乙酉車駕至平涼己亥行  
幸安定庚子帝自安定還臨平涼遂掘塹圍守之行幸

紐城安慰初附赦秦隴之人賜復十年辛酉安頡帥諸  
軍攻滑臺沮渠蒙遜遣使朝貢壬寅封壽光侯叔孫建  
為丹陽王十二月丁卯赫連定弟杜于度洛孤面縛出  
降平涼收其珍寶定長安臨晉武功守將皆遁走關中  
平壬申車駕還東留巴東公延普等鎮安定

四年春正月壬午車駕次木根山大饗羣臣丙申宋將  
檀道濟王仲德從清水救滑臺丹陽王叔孫建汝陰公  
長孫道生拒之道濟等不敢進是月赫連定滅乞伏慕

末二月辛酉安頡司馬楚之剋滑臺癸酉車駕還宮飲  
至策勲告于宗廟賜留臺百官各有差青土賜復十年  
定州人饑詔開倉以振之宋將檀道濟王仲德東走三  
月庚戌冠軍將軍安頡獻宋俘萬餘人甲兵三萬夏六  
月赫連定北襲沮渠蒙遜為吐谷渾慕瑣所執閏月乙  
未蠕蠕國遣使朝貢詔散騎侍郎周紹使于宋秋七月  
己酉行幸河西起承華宮八月乙酉沮渠蒙遜遣子安  
周入侍吐谷渾慕瑣遣使奉表請送赫連定己丑以慕

瓚為大將軍封西秦王九月癸丑車駕還宮庚申加太尉長孫嵩柱國大將軍以左光祿大夫崔浩為司徒征西大將軍長孫道生為司空癸亥詔兼太常李順持節拜西河王沮渠蒙遜為假節加侍中都督涼州持節及西域羌戎諸軍事行征西大將軍太傅涼州牧涼王壬申詔曰范陽盧元博陵崔綽趙郡李靈河間邢穎勃海高允廣平游雅太原張偉等皆賢雋之胄冠冕州邦有羽儀之用易曰我有好爵吾與爾縻之如元之比隱跡

衡門不曜名譽者盡敕州郡以禮發遣遂徵元等州郡所遣至者數百人皆差次叙用冬十月戊寅詔司徒崔浩改定律令行幸漠南十一月丙辰北部敕勒莫弗庫若干率其部數萬騎驅鹿獸數百萬詣行在所帝因而大狩以賜從者勒石漠南以紀功德宜城王奚斤坐事降爵為公十二月車駕還宮

延和元年春正月丙午尊保太后為皇太后立皇后赫連氏以皇子晃為皇太子謁于太廟大赦改元三月丁

未追贈夫人賀氏為皇后壬申西秦王吐谷渾慕瓚送  
赫連定於京師夏五月宋人來聘六月庚寅車駕伐和  
龍詔尚書左僕射安原等屯于漠南以備蠕蠕辛卯詔  
兼散騎常侍鄧頴使於宋秋七月己巳車駕至和龍穿  
塹以守之是月築東宮九月乙卯車駕西還徙營邱成  
周遼東樂浪帶方元菟六郡人三萬家于幽州開倉以  
振之冬十月吐谷渾慕瓚遣使朝貢十一月己巳車駕  
至自和龍十二月己丑馮弘子長樂公崇及其母弟朗

朗弟邈以遼西內屬先是辟召賢良而州郡多逼遣之  
詔以禮申喻任其進退

二年春二月庚午詔兼鴻臚卿李繼持節假馮崇車騎  
大將軍遼西王承制聽置尚書己下壬午詔兼散騎常  
侍宋宣使於宋夏四月沮渠蒙遜死以其子牧犍為車  
騎將軍改封西河王六月遣永昌王健尚書左僕射安  
原督諸軍討和龍辛巳詔樂安王範發秦雍兵一萬築  
小城於長安城內秋八月遼西王馮崇上表求說降其



文帝不聽九月宋人來聘并獻馴象一戊午詔兼大鴻臚卿崔頤持節拜征虜將軍揚難當為征南大將軍儀同三司封南秦王冬十二月己巳大赦天下辛未幸陰山北詔兼散騎常侍盧元使於宋

三年春正月乙未車駕次于女水大饗羣臣戊戌馮弘遣使求和帝不許丙辰南秦王楊難當尅漢中送雍州流人七千家于長安二月戊寅詔以頻年屢征有事西北運輸之役百姓勤勞令郡縣括貧富以為三級富者

租賦如常中者復二年下窮者復三年辛卯車駕還宮  
三月甲寅行幸河西閏月甲戌秦王赫連昌叛走丙子  
河西候將格殺之驗其謀反羣弟皆伏誅己卯車駕還  
宮進彭城公粟爵為王秋七月辛巳東宮成備置屯衛  
三分西宮之一壬午行幸美稷遂至隰城命諸軍討山  
胡白龍于河西九月戊子尅之斬白龍及其將帥屠其  
城冬十一月車駕還宮十二月甲辰行幸雲中

太延元年春正月乙未朔日有蝕之壬午降死罪刑已

下各一等癸未出道武明元宮人令得嫁甲申大赦改  
元二月庚子蠕蠕焉耆車師各遣使朝貢詔長安及平  
涼人徙在京師其孤老不能自存者聽還鄉里丁未車  
駕還宮夏五月庚申進宜都公穆壽為宜都王汝陰公  
長孫道生為上黨王宜城公奚斤為恒農王廣陵公婁  
伏連為廣陵王遣使者二十輩使西域甲戌行幸雲中  
六月甲午詔曰去春小旱東作不茂憂勤尅已祈請靈  
祇豈朕精誠有感何報應之速雲雨震灑流澤霑渥有

鄙婦人持方寸玉印詣潞縣侯孫家既而亡去莫知所  
在印有三字為龍鳥之形要妙奇巧不涉人迹文曰旱  
疫平推尋其理蓋神靈之報應也比者以來禎瑞仍臻  
甘露流液降於殿內嘉瓜合蒂生于中山野木連理殖  
於魏郡在先后載誕之鄉白鷺集于盛樂舊都元鳥隨  
之蓋有千數嘉禾頻歲合秀於恒農白兔並見於勃海  
白雉三隻又集於平陽太祖之廟天降嘉貺將何德以  
酬之其令天下大酺五日禮報百神守宰祭界內名山

大川上答天意丙午高麗鄒善國並遣使朝貢秋七月  
田於相陽己卯樂平王丕等五將東伐至和龍徙男女  
六千口而還八月丙戌行幸河西粟特國遣使朝貢九  
月車駕還宮冬十月癸卯尚書左僕射安原謀反伏誅  
甲辰行幸定州次于新城宮十一月己巳校獵于廣川  
丙子行幸鄴祀密太后廟諸所過親問高年褒禮賢俊  
十二月癸卯遣使者以太牢祀北嶽

二年春正月甲寅車駕還宮二月戊子馮弘遣使朝貢

來送侍子帝不許壬辰遣使者十餘輩詣高麗東夷諸國詔諭之三月丙辰宋人來聘辛未遣平東將軍娥清安西將軍古弼討馮弘弘求救於高麗高麗遣其大將葛募盧迎之夏四月甲寅皇子小兒苗兒並薨五月乙卯馮弘奔高麗戊午詔散騎常侍封撥使高麗徵送馮弘丁卯行幸河西赫連定之西也楊難當竊據上邽秋七月庚戌命樂平王丕等討之詔散騎常侍游雅使於宋八月丁亥遣使六輩使西域帝校獵于河西詔廣平

公張黎發定州七郡一萬二千人通莎泉道甲辰高車  
國遣使朝貢九月庚戌樂平王丕等至略陽公楊難當  
奉詔攝上邽守高麗不送馮弘帝將伐之納樂平王丕  
計而止冬十一月己酉幸柤陽驅野馬於雲中置野馬  
苑閏月壬子車駕還宮乙丑改封潁川王提為武昌王  
河西王沮渠牧犍遣使朝貢是歲吐谷渾慕瓚死

三年春正月癸未中山王纂薨戊子太尉北平王長孫  
嵩薨乙巳丹陽王叔孫建薨二月乙卯行幸幽州存恤

孤老問民疾苦還幸上谷遂至代所過復田租之半三月己卯車駕還宮丁酉宋人來聘夏五月己丑詔天下吏民得舉告守令不如法者丙申行幸雲中秋七月戊子使永昌王健上黨王長孫道生討山胡白龍餘黨於西河滅之八月甲辰行幸河西九月甲申車駕還宮丁丑遣使者拜西秦王慕瓚弟慕利延為鎮西大將軍儀同三司改封西平王冬十月癸卯行幸雲中十一月壬申車駕還宮是歲河西王沮渠牧犍世子封壇來朝高



麗契丹龜茲悅般焉耆車師粟特疏勒烏孫渴盤陁鄯善破落者舌等國各遣使朝貢

四年春三月庚辰鄯善王弟素延耆來朝癸未罷沙門年五十已下江陽王根薨是月高麗殺馮弘夏五月戊寅大赦秋七月壬申車駕北伐冬十一月丁卯朔日有蝕之十二月車駕至自北伐上洛巴泉輩等相帥內附詔兼散騎常侍高雅使于宋

五年春正月庚寅行幸定州三月辛未車駕還宮庚寅

以故南秦王世子楊保宗為征南大將軍秦州牧武都王鎮上邽夏五月癸未遮逸國獻汗血馬六月甲辰車駕西討沮渠牧犍侍中宜都王穆壽輔皇太子決留臺事大將軍長樂王嵇敬輔國大將軍建寧王崇二萬人屯漠南以備蠕蠕秋七月己巳車駕至上都屬國城大饗羣臣講武馬射壬午留輜重分部諸軍八月丙申車駕至姑臧牧犍兄子祖踰城來降乃分軍圍之九月丙戌牧犍與左右文武五千人面縛軍門帝解其縛待以

藩臣之禮收其城內戶口二十餘萬倉庫珍寶不可稱  
計進張掖公禿髮保周爵為王與龍驤將軍穆羆安遠  
將軍源賀分略諸郡牧犍弟張掖太守宜得西奔酒泉  
太守無諱後奔晉昌樂都太守安周南奔吐谷渾戊子  
蠕蠕犯塞遂至七介山京都大駭皇太子命上黨王長  
孫道生等拒之冬十月辛酉車駕還宮徙涼州人三萬  
餘家于京師留樂平王丕征西將軍賀多羅鎮涼州癸  
亥遣張掖王禿髮保周喻諸部鮮卑保周因率諸部叛

於張掖十一月乙巳宋人來聘并獻馴象一十二月壬午車駕至自西伐飲至策勲告于宗廟揚難當寇上邦鎮將元勿頭討走之是歲鄯善龜茲踈勒焉耆高麗粟特渴盤陁郝悉半居等國並遣使朝貢

太平真君元年春正月己酉沮渠無諱圍酒泉辛亥分遣侍臣巡行州郡觀察風俗問民疾苦三月己巳詔假通直常侍邢穎使於宋發長安人五千浚昆明池三月酒泉陷夏四月戊午朔日有蝕之庚辰沮渠無諱寇張

掖禿髮保周屯鄒舟六月丁丑皇孫濬生大赦改元秋  
七月行幸陰山己丑永昌王健大破禿髮保周走之丙  
申保太后竇氏崩于行宮癸丑保周自殺傳首京師八  
月甲申沮渠無諱降九月壬寅車駕還宮是歲州鎮十  
五饑詔開倉振恤之以河南王曜子羯兒為河間王後  
改封略陽王

二年春正月癸卯拜沮渠無諱為征西大將軍涼州牧  
酒泉王三月辛卯葬惠太后於崞山庚戌新興王俊略

陽王錫兒有罪黜為公辛亥封蠕蠕郁久閭乞歸為朔  
方王沮渠萬年為張掖王夏四月丁巳宋人來聘秋八  
月辛亥詔散騎侍郎張偉使于宋九月戊戌永昌王健  
薨冬十一月庚子鎮南大將軍奚眷平酒泉十二月丙  
子宋人來聘

三年春正月甲申帝至道壇親受符籙備法駕旗幟盡  
青三月壬寅北平王長孫頽有罪削爵為侯夏四月酒  
泉王沮渠無諱走渡流沙據鄯善西涼李嵩孫李寶據

敦煌遣使內附五月行幸陰山北六月丙戌揚難當朝  
於行宮先是起殿於陰山北殿成而難當至因曰廣德  
焉秋八月甲戌晦日有蝕之冬十月己卯封皇子伏羅  
為晉王翰為秦王譚為燕王建為楚王余為吳王十二  
月辛巳太保襄城公盧魯元薨丁酉車駕還宮李寶遣  
使朝貢以寶為鎮西大將軍開府儀同三司沙州牧敦  
煌公

四年春正月庚午行幸中山二月丙子次于恒山之陽

詔有司刊石勒銘是月尅仇池三月庚申車駕還宮夏  
四月武都王楊保宗謀反諸將禽送京師氏羌復推保  
宗弟文德為主圍仇池六月庚寅詔復民貲賦三年其  
田租歲輸如常牧守不得妄有徵發癸巳大閱于西郊  
九月辛丑行幸漠南甲辰捨輜重以輕騎襲蠕蠕分軍  
為四道冬十一月甲子車駕還至朔方詔曰夫陰陽有  
往復四時有代謝授子任賢蓋古今不易之令典也其  
令皇太子副理萬機總統百揆諸功臣勤勞日久皆當



以爵歸第隨時朝請饗宴朕前論道陳謨而已不宜復  
煩以劇職更舉賢俊以備百官明為科制以稱朕心十  
二月辛卯車駕至自北伐

五年春正月壬寅皇太子始總百揆侍中中書監宜都  
王穆壽司徒東都公崔浩侍中廣平公張黎侍中建興  
公古弼輔太子以決庶政諸上書者皆稱臣上疏儀與  
表同戊申詔自王公已下至於庶人私養沙門師巫及  
金銀工巧之人在其家者皆遣詣官曹限今年二月二

十五日過期不出巫沙門身死主人門誅庚戌詔自王公已下至於卿士其子息皆詣太學其百工伎巧騶卒子息當習其父兄所業不聽私立學校違者師身死主人門誅二月辛未中山王辰等八人以北伐後期斬于都南癸酉樂平王丕薨庚辰行幸廬三月戊辰大會于邯南遣使者四輩使西域甲辰車駕還宮夏四月乙亥太宰陽平王杜超為帳下所殺五月丁酉行幸陰山北六月西平王吐谷渾慕利延殺其兄子緯代立緯弟叱

力延等來奔乞師以叱力延為歸義王秋八月乙丑田  
于河西壬午詔員外散騎常侍高濟使於宋九月帝自  
河西至于馬邑觀于崢川乙亥車駕還宮丁未行幸漠  
南冬十月癸未晉王伏羅大破慕利延慕利延走奔白  
蘭其部一萬三千內附十一月宋人來聘十二月丙戌  
車駕還宮

六年春正月辛亥行幸定州引見長老存問之詔兼員  
外散騎常侍宋愔使于宋二月遂西幸上黨觀連理樹

於元氏至吐京討徙叛胡出配郡縣三月庚申車駕還宮詔諸有疑獄皆付中書以經義量決夏六月戊子朔日有蝕之壬辰北巡秋八月壬辰散騎常侍成周公萬度歸以輕騎至鄯善執其王真達與詣京師帝大悅厚待之車駕幸陰山北次于廣德宮詔發天下兵三取一各當戒嚴以須後命徙諸種雜人五千餘家於北邊令人北徙畜牧至廣漠以餌蠕蠕壬寅征西大將軍高涼王邠等討吐谷渾慕利延軍到晏頭城慕利延驅其部

落西度流沙郗急追故西秦王慕瑣世子被囊逆軍拒

戰郗擊破之中山公杜豐追度三危至雪山禽被囊及

慕利延元子什歸熾盤子成龍送于京師慕利延遂西

入于闐國九月盧水胡蓋吳聚衆反於杏城冬十一月

高涼王郗振旅還京師庚申遼東王竇漏頭薨河東蜀

薛永宗聚黨入汾曲西通蓋吳受其位號蓋吳自號天

台王署百官辛未車駕還宮選六州兵勇猛者使永昌

王仁高涼王郗分領為二道南略淮泗以北徙青徐之

人以實河北癸未西巡

七年春正月戊辰車駕次東雍禽薛永宗斬之其男女  
無少長皆赴水死辛未南幸汾陰蓋吳退走北地二月  
丙戌幸長安存問父老丁亥幸昆明池遂田于岐山之  
陽所過誅與蓋吳通謀反害守將者三月詔諸州坑沙  
門毀諸佛像徙長安城內工巧三千家於京師夏四月  
甲申車駕至自長安戊子毀鄴城五層佛圖於泥像中  
得玉璽二其文皆曰受命於天既壽永昌其一刻其旁

曰魏所受漢傳國璽五月蓋吳復聚杏城自號秦地王  
丙戌發司幽定冀四州十萬人築畿上塞圍起上谷西  
至于河廣袤皆千里六月癸未朔日有蝕之秋八月蓋  
吳為其下人所殺傳首京師復略陽公羯兒王爵

八年春正月癸未行幸中山三月河西王沮渠牧犍謀  
反伏誅夏五月車駕還宮六月西征諸將扶風公處真  
等八將坐盜沒軍資所在虜掠贓各千萬計並斬之秋  
八月樂安王範薨冬十一月侍中中書監宜都王穆壽

薨十二月晉王伏羅薨

九年春正月宋人來聘二月癸卯行幸定州山東人饑  
詔開倉振之罷塞圍作遂西幸上黨詔於壺關東北大  
王山累石為三封又塹其鳳皇山南足以斷之三月車  
駕還宮夏五月甲戌以交趾公韓拔為假征西將軍領  
護西戎校尉鄯善王鎮鄯善賦役其人比之郡縣六月  
辛酉行幸廣德宮丁卯悅般國遣使求與王師俱討蠕  
蠕帝許之秋八月詔中外諸軍戒嚴九月乙酉練兵于



西郊丙戌幸陰山是月成周公萬度歸千里驛上大破  
焉耆國其王鳩尸卑那奔龜茲冬十月辛丑恒農王奚  
斤薨癸卯以婚姻奢靡喪葬過度詔有司更為科限癸  
亥大赦十二月詔成周公萬度歸自焉耆西討龜茲皇  
太子朝于行宮遂從北討至受降城不見蠕蠕因積糧  
城內留守而還北平王長孫敦坐事降爵為公

十年春正月戊辰朔帝在漠南大饗百寮甲戌蠕蠕吐  
賀真懼遠遁三月蒐于河西庚寅車駕還宮夏四月丙

申朔日有蝕之九月閱武於磧上遂北伐冬十月庚子  
皇太子及羣官奉迎於行宮十二月戊申車駕至自北  
伐己酉以平昌公託真為中山王

十一年春正月乙丑行幸洛陽所過郡國皆親對高年  
存恤孤寡二月甲午大蒐於梁川皇子真薨是月大修  
宮室皇太子居于北宮車駕遂征懸瓠夏四月癸卯車  
駕還宮賜從者及留臺郎吏已上生口各有差六月己  
亥誅司徒崔浩辛丑北巡陰山秋七月宋將王元謨攻

滑臺八月辛亥田于河西癸未練兵於西郊九月辛卯  
車駕南伐癸巳皇太子北伐屯于漠南吳王余留守京  
都庚子曲赦定冀相三州死罪已下冬十月乙丑車駕  
濟河元謨棄軍而走乃命諸將分道並進車駕自中道  
十一月辛卯至鄒山使使者以太牢祀孔子是月頽盾  
國獻師子十二月丁卯車駕至淮詔刈藿葦作筏數  
萬而濟淮南皆降癸未車駕臨江起行宮於瓜步山諸  
軍同日皆臨江所過城邑莫不望塵奔潰其降附者不

可勝數甲申宋文帝使獻百牢貢其方物又請進女於  
皇孫以求和好帝以師婚非禮許和而不許婚使散騎  
侍郎夏侯野報之帝詔皇孫為書致馬通問焉

正平元年春正月丙戌朔大會羣臣於江上文武受爵  
者二百餘人丁亥車駕北旋二月癸未次于魯口皇太  
子朝於行宮三月己亥車駕至自南伐飲至策勲告於  
宗廟以降人五萬餘家分置近畿賜留臺文武所獲軍  
資生口各有差夏五月壬寅大赦六月壬戌改元車師

國王遣子入侍詔以刑網太密犯者更衆命有司具案律令務求厥中自餘有不便於民者依比增損詔太子少傅游雅中書侍郎胡方回等改定律制略陽王羯兒高涼王郙有罪賜死戊辰皇太子薨壬申葬景穆太子於金陵秋七月丁亥行幸陰山省諸曹吏員三分之一九月癸巳車駕還宮冬十月庚申行幸陰山宋人來聘詔殿中將軍郎法祐使於宋己巳司空上黨王長孫道生薨十二月丁丑車駕還宮封皇孫濬為高陽王尋以

皇孫世嫡不宜在藩乃止改封秦王翰為東平王燕王  
譚為臨淮王楚王建為廣陽王吳王余為南安王

二年春正月庚辰朔南來降人五千餘家於中山謀叛  
州軍討平之冀州刺史張掖王沮渠萬年與降人通謀  
賜死三月甲寅中常侍宗愛構逆帝崩於永安宮時年  
四十五祕不發喪愛又矯皇后令殺東平王翰迎南安  
王余立大赦改元為承平尊諡帝曰太武皇帝葬於雲  
中金陵廟號世祖帝生不逮密太后及有所識言則悲

慟哀感傍人明元聞而嘉歎及明元不豫衣不釋帶性清儉率素服御飲膳取給而已不好珍麗食不二味所幸昭儀衣無兼綵羣臣白帝更峻京邑城隍以從周易設險之義又陳蕭何壯麗之說帝曰古人有言在德不在險屈丐蒸土築城而朕滅之豈在城也今天下未平方須人力土功之事朕所未為蕭何之對非雅言也每以財者軍國之本無所輕費至於賞賜皆是勲績之家親戚愛寵未曾橫有所及臨敵常與士卒同在矢石間

左右死傷相繼而帝神色自若是以人思効命所向無前命將出師指授節度從命者無不制勝違棄者率多敗失性又知人拔士於卒伍之中唯其才效所長不論本末兼甚嚴斷明於刑賞功者賞不遺賤罪者刑不避親雖寵愛之終不虧法常曰法者朕與天下共之何敢輕也故大臣犯法無所寬假雅長聽察瞬息之間下無以措其姦隱然果於誅戮後多悔之司徒崔浩死後帝北伐時宣城公李孝伯疾篤傳者以為卒帝聞而悼之



謂左右曰李宣城可惜又曰朕向失言崔司徒可惜李宣城可哀褒貶雅意皆此類也

太武帝始光神麤各四年延和三年太延五年太平真君十一年正平二年即位二十九年

臣謹按景穆太子未嘗即位後追謚為皇帝既無年號不當立紀太子諱晃太武之長子也母曰賀夫人延和元年正月丙午立為皇太子時年五歲明慧彊識聞則不忘及長好讀經史皆通大義太武甚奇之

及西征涼州皇太子監國初太武之伐河西李順等咸言姑臧無水草不可行師太子有疑色及車駕至姑臧乃詔太子曰姑臧城東西門外涌泉合於城北其大如河澤草茂盛可供大軍數年人之多言亦可惡也太子謂宮臣曰為人臣不實若此豈為忠乎吾初聞有疑但帝決行耳幾誤人大事言者復何面目見帝也太平真君四年從征蠕蠕至鹿渾谷與賊遇虜惶怖擾亂太子言於太武曰宜速進擊掩其不備

中書令劉潔固諫以為塵盛賊多須軍大集太子曰  
此塵之盛當由賊驚故也太武疑之遂不急擊蠕蠕  
遠遁既而獲虜候騎乃云不覺官軍卒至上下惶懼  
北走經六七日知無追者乃徐行帝深恨之自是太  
子所言軍國大事多見納用遂知萬機及監國命有  
司使百姓有牛家以人牛相質又禁飲酒雜戲棄本  
酤販者於是墾田大增正平元年六月戊辰薨於東  
宮時年二十四庚午命持節兼太尉張黎兼司空竇

瑾奉策即柩諡曰景穆太子文成即位追尊為景穆  
皇帝廟號恭宗

高宗文成皇帝諱濬景穆皇帝之長子也母曰閭氏太  
平真君元年六月生於東宮帝少聰達太武常置左右  
號世嫡皇孫年五歲太武北巡帝從在後逢虜帥桎一  
奴將加罰帝謂曰奴今遭我汝宜釋之帥奉命解縛太  
武聞之曰此兒雖小欲以天子自處意奇之及長風格  
異常每參決大政可否正平二年三月中常侍宗愛弒

逆立南安王余十月丙午朔又賊殺余於是殿中尚書  
長孫渴侯與尚書陸麗奉迎世嫡皇孫

興安元年冬十月戊申皇帝即位於永安前殿大赦改  
正平二年為興安元年以驃騎大將軍元壽樂為太宰  
都督中外諸軍錄尚書事以尚書長孫渴侯為尚書令  
儀同三司十一月丙子二人爭權並賜死癸未廣陽王  
建臨淮王譚薨甲申皇妣閭氏薨進平南將軍宋子侯  
周怵爵為樂陵王南部尚書常安子陸麗為平原王文

武各加位一等壬寅追尊皇考景穆太子為景穆皇帝  
妣閻氏為恭皇后尊保母常氏為保太后十二月戊申  
祔葬恭皇后於金陵乙卯初復佛法丁巳以樂陵王周  
忸為太尉平原王陸麗為司徒鎮西將軍杜元寶為司  
空保達沙獵等國各遣使朝貢戊寅進建業公陸俟爵  
為東平王進廣平公杜遺爵為王癸亥詔以營州蝗開  
倉振恤甲子太尉樂陵王周忸有罪賜死進濮陽公閻  
若文爵為王

二年春正月辛巳進司空杜元寶爵為京兆王廣平王  
杜遺薨進尚書僕射東安公劉尼爵為王封建寧王崇  
子麗為濟南王癸未詔與百姓雜調十五丙戌進尚書  
西平公源賀爵為王二月己未司空京兆王杜元寶謀  
反伏誅建寧王崇崇子濟南王麗為元寶所引各賜死  
乙丑發京師五千人穿天泉池是月宋太子劭弑文帝  
三月尊保太后為皇太后進安豐公閻虎皮爵為河間  
王夏五月宋孝武帝殺太子劭而自立閏月乙亥太皇

太后赫連氏崩秋七月辛亥行幸陰山濮陽王閭若文  
永昌王仁謀反乙卯仁賜死若文伏誅己巳車駕還宮  
是月築馬射臺於南郊八月戊戌詔曰朕即位已來風  
雨順序邊方無事衆瑞兼呈又於苑內獲方寸玉印其  
文曰子孫長壽羣公卿士咸曰休哉豈朕一人克臻斯  
應實由天地祖宗降祐之所致也思與兆庶共茲嘉慶  
其令百姓大酺三日降殊死己下囚九月壬子閱武於  
南郊冬十一月辛酉行幸信都中山觀察風俗十二月



甲午車駕還宮復北平公長孫敦王爵是歲踈勒渴盤  
陀庫莫奚契丹罽賓等國各遣使朝貢

興光元年春正月乙丑以侍中河南公伊弼為司空二  
月甲午帝至道壇登受圖錄禮畢曲赦京師夏六月行  
幸陰山秋七月丙申朔日有蝕之庚子皇子弘生辛丑  
大赦改元八月甲戌趙王深薨乙亥車駕還宮乙丑皇  
叔虎頭龍頭薨九月庫莫奚國獻名馬有一角狀如麟  
閉都門大索三日獲姦人亡命數百人冬十一月戊戌

行幸中山遂幸信都十二月丙子還幸靈邱至溫泉宮  
庚辰車駕還宮出于叱萬單等國各遣使朝貢

太安元年春正月辛酉奉太武景穆神主于太廟樂平  
王拔有罪賜死二月癸未武昌王提薨三月己亥以太  
武景穆神主入太廟改元曲赦京師死囚已下夏六月  
壬戌詔名皇子弘曲赦癸酉詔尚書穆真等二十人巡  
行州郡觀察風俗大明賞罰冬十月庚午以遼西公常  
英為太宰進爵為王是歲遮逸波斯踈勒等國各遣使

朝貢

二年春正月乙卯立皇后馮氏二月丁巳立皇子弘為  
皇太子大赦夏六月羽林中郎于判元提等謀逆誅秋  
八月田於河西平西將軍漁陽公尉眷北擊伊吾尅其  
城大獲而還九月辛巳進河東公閭毗零陵公閭紇爵  
並為王冬十月甲申車駕還宮甲午曲赦京師十一月  
改封西平王源賀隴西王噉噠普嵐等國各遣使朝貢  
三年春正月徵漁陽公尉眷拜太尉進爵為王錄尚書

事夏五月封皇弟新成為陽平王六月癸卯行幸陰山  
秋八月田於陰山之北己亥還宮冬十月將東巡詔太  
宰常英起行宮於遼西黃山十二月州鎮五蝗百姓饑  
使開倉振給之是歲粟特于闐等五十餘國並遣使朝  
貢

四年春正月丙午朔初設酒禁乙卯行幸廣寧溫泉宮  
遂東巡庚午至遼西黃山宮遊宴數日親對高年勞問  
疾苦二月丙子登碣石山觀滄海大饗羣臣於上班

賞進爵各有差改碣石山為樂遊山築壇記行於海濱

戊寅南幸信都田於廣川三月丁未觀馬射於中山所

過郡國賜復一年丙辰車駕還宮起太華殿乙丑東平

王陸俟薨夏五月壬戌詔曰比年以來雜調減省而所

在州郡咸有逋懸非在職之官緩惰失所貪穢過度誰

使之然自今常調不充人不安業宰民之徒加以死罪

六月丙申田於松山秋七月庚午行幸河西九月丁巳

還宮辛亥太華殿成丙寅饗羣臣大赦冬十月甲戌北

巡至陰山有故冢毀廢詔曰昔姬文葬枯骨天下歸仁  
自今有穿墳壠者斬之辛卯次于車輪山累石紀行十  
一月車駕度漠蠕蠕絕迹遠遁十二月中山王託真薨  
五年春二月己酉司空河南公伊弼薨三月庚寅曲赦  
京師死罪已下夏四月乙巳封皇弟子推為京兆王五  
月常居國遣使朝貢六月戊申行幸陰山秋八月庚戌  
遂幸雲中壬戌還宮九月戊辰儀同三司敦煌公李寶  
薨冬十二月戊申詔以六鎮雲中高平二雍秦州徧遇

災旱年穀不收開倉廩振乏有徙流者喻還桑梓

和平元年春正月甲子朔大赦改元庚午詔散騎侍郎  
馮闡使於宋夏四月戊戌皇太后常氏崩於壽安宮五  
月癸酉葬昭太后於廣甯鳴鷄山六月甲午詔征西大  
將軍陽平王新成等討吐谷渾什寅崔浩之誅也史官  
遂廢至是復置秋七月西征諸軍至西平什寅走保南  
山九月庚申朔日有蝕之是月諸軍濟河追什寅遇瘴  
氣多病疫乃引還庚午車駕還宮冬十月居常王獻駟

象三十一年一月詔散騎侍郎盧度世使於宋

二年春正月乙酉詔曰刺史牧民為萬里之表自頃每  
因發調逼人假貸大商富賈要射時利上下通同分以  
潤屋為政之弊莫過於此其一切禁絕犯者十足以上  
皆死布告天下咸令知禁二月行幸中山遂幸信都三  
月宋人來聘車駕所過皆親對高年問疾苦詔年八十  
一子不從役靈邱南有山高四百餘丈乃詔羣臣仰射  
山峯無能踰者帝彎弧發矢出三十餘丈過山南二百



二十步遂刊石勒銘是月發并肆州五千餘人修河西

獵道辛巳車駕還宮夏四月乙未河東王閭毗薨五月

癸未詔南部尚書黃盧頭李敷業考課諸州秋七月戊

寅封皇弟小新成為濟陰王天賜為汝陰王萬壽為樂

良王洛侯為廣平王八月波斯國遣使朝貢冬十月詔

假員外散騎常侍游明根使於宋廣平王洛侯薨

三年春正月壬午以東郡公乙渾為太原王癸未樂良

王萬壽薨二月壬子朔日有蝕之癸酉田於崞山遂觀

漁于旋馬池三月甲申宋人來聘高麗蕙王契啗思厭  
於師疏勒石那悉居半渴盤陔等國並遣使朝貢夏六  
月庚申行幸陰山秋七月壬寅幸河西九月壬辰常山  
王素薨冬十月詔員外散騎常侍游明根使于宋十一  
月壬寅車駕還宮十二月乙卯制戰陣之法十有餘條  
因大讎耀兵有飛龍騰虵魚麗之變以示威武戊午零  
陵王問拔薨

四年春三月乙未賜京師人年七十以上太官厨食以

終其年皇子胡仁薨追封樂陵王夏四月癸亥上幸西苑親射猛虎三頭五月壬辰侍中漁陽王尉眷薨壬寅行幸陰山秋七月壬午詔曰朕每歲閑月命羣臣講武所幸之處必立宮壇靡費之功勞損非一宜仍舊貫何必改作也八月丙寅遂田于河西九月辛巳車駕還宮冬十月以定相二州霽霜傷稼免其田租詔員外散騎常侍游明根使於宋十二月辛丑詔以喪葬嫁娶大禮未備命有司為之條格使貴賤有章上下咸序著之于

令壬寅詔曰婚姻者人道之始比者以來貴族之門多不率法或貪利財賂或因緣私好在於苟合無所擇選塵穢清化虧損人倫將何以宣示典謨垂之來裔令制皇族肺腑王公侯伯及士庶之家不得與百工伎巧卑姓為婚犯者加罪

五年春正月丁亥封皇弟雲為任城王二月詔以州鎮十四去歲蟲水開倉振恤夏四月癸卯進封頓丘公李峻為王閏月戊子帝以旱故減膳責身是夜澍雨大降

五月宋孝武帝殂六月丁亥行幸陰山秋七月壬寅行幸河西九月辛丑車駕還宮冬十月琅邪侯司馬楚之薨十二月南秦王楊難當薨吐呼羅國遣使朝貢

六年春正月丙申大赦二月丁丑行幸樓煩宮高麗蕝王對曷等國各遣使朝貢三月戊戌相州刺史西平郡王吐谷渾權薨乙巳車駕還宮夏四月破洛那國獻汗血馬普嵐國獻寶劍五月癸卯帝崩于太華殿時年二十六六月丙寅奉尊諡曰文成皇帝廟號高宗八月葬

雲中之金陵

文成帝興安二年興光元年太安五年和平六年  
即位十四年

顯祖獻文皇帝諱弘文成皇帝之長子也母曰李貴人  
興光元年七月生於陰山之北大安二年二月立為皇  
太子和平六年五月甲辰即皇帝位大赦尊皇后曰皇  
太后車騎大將軍乙渾矯詔殺尚書楊保年平陽公賈  
愛仁南陽公張天度于禁中戊申司徒公平原王陸麗

自湯泉入朝又殺之己酉以渾為太尉公以錄尚書事  
東安王劉尼為司徒公以尚書左僕射和其奴為司空  
公六月封繁陽侯李寔為丹陽王征東大將軍馮熙為  
昌黎王秋七月癸巳以太尉乙渾為丞相位居諸王上  
事無大小皆決焉九月庚子曲赦京師丙午詔曰先朝  
以州牧親民宜置良佐故賴有司班九條之制使前政  
選吏以待後人然牧司舉非其人慙于典度今制刺史  
守宰到官之日仰自舉人望忠信以為選官不論前政

共相平置若簡任失所以罔上論是月宋義陽王劉昶  
自彭城來奔冬十月徵陽平王新成京兆王子推濟陰  
王小新成汝陰王天賜任城王雲入朝十一月宋湘東  
王彧弒其主子業而自立

天安元年春正月己丑朔大赦改元二月庚申丞相太  
原王乙渾謀反伏誅乙亥以侍中元孔雀為濮陽王侍  
中陸定國為東郡王三月庚子以隴西王源賀為太尉  
公辛丑高宗文成皇帝神主祔于太廟辛亥帝幸道壇



親受符籙曲赦京師秋九月己酉初立鄉學郡置博士  
二人助教二人學生六十人冬十二月皇帝安平王薨  
是歲州鎮十一旱民饑開倉振恤

皇興元年春正月癸巳鎮南大將軍尉元大破宋將張  
永沈攸之於呂梁東宋人來聘庚子東平王道符謀反  
於長安其司馬段太陽斬之傳首京師道符兄弟皆伏  
誅閏月以頓丘王李峻為太宰二月濟陰王小新成薨  
宋東平太守申纂戍無鹽遏絕王使詔征南大將軍慕

容白曜督諸軍往討三月甲寅尅之秋八月丁酉幸武  
州山石窟寺戊申皇子宏生大赦改元九月己巳進馮  
翊公李白為梁郡王冬十月己亥朔日有蝕之癸卯田  
於鄒男池濮陽王孔雀坐怠慢降為公

二年春二月癸未田于西山親射虎豹三月慕容白曜  
進圍東陽戊午宋人來聘夏四月丙子朔日有蝕之辛  
丑進南郡公李惠爵為王五月乙卯田于崢山遂幸繁  
時辛酉車駕還宮六月庚辰以河南關地曲赦京師殊

死以下以昌黎王馮熙為太傅秋九月辛亥封皇叔禎  
為南安王長壽為城陽王太洛為章武王休為安定王  
冬十月癸酉朔日有蝕之辛丑田于泠泉十一月州鎮  
二十七水旱詔開倉振卹十二月甲午詔曰頃張永敢  
拒王威暴骨原隰天下之人一也其永軍殘廢之士聽  
還江南露骸草莽者勅州縣收瘞之

三年春正月乙丑東陽潰虜沈文秀戊辰司空平昌公  
和其奴薨三月己卯進上黨公慕容白曜爵為濟南王

夏四月壬辰宋人來聘丙申名皇子宏大赦丁酉田于  
崞山五月徙青齊人於京師六月辛未立皇子宏為皇  
太子冬十月丁卯朔日有蝕之是月太宰頓邱王李峻  
薨十一月進襄城公韓頽爵為王

四年春正月州鎮大饑詔開倉振卹二月以東郡王陸  
定國為司空公詔征西大將軍上黨王長孫觀討吐谷  
渾什寅廣陽王石侯薨三月丙戌詔天下人病者所在  
官司遣醫就家診視所須藥任醫所量給之夏四月辛

丑大赦戊申長孫觀軍至曼頭山大破什寅五月封皇  
弟長樂為建昌王六月宋人來聘秋八月蠕蠕犯塞九  
月丙寅車駕北伐諸將俱會于女水大破虜軍司徒東  
安公劉尼坐事免壬申車駕至自北伐飲至策勲告于  
宗廟冬十月誅濟南王慕容白曜高平公李敷十一月  
詔弛山澤禁十二月甲辰幸鹿野苑石窟寺陽平王新  
成薨

五年春二月乙亥詔假員外散騎常侍邢祐使于宋夏

四月北平王長孫敦薨六月丁未行幸河西秋七月丙寅遂至陰山八月丁亥車駕還宮帝幼而神武聰睿機悟有濟人之規仁孝純至禮敬師友及即位雅薄時務常有遺世之心欲禪位於叔父京兆王子推羣臣固請帝乃止丙午使太保健安王陸馭太尉源賀持節奉皇帝璽綬冊命皇太子升帝位於是羣公奏上尊號太上皇帝乃從之己酉太上皇帝徙御崇光宮彩椽不斷土階而已國之大事咸以聞承明元年文明太后有憾于

帝帝崩於永安殿時年二十三上尊諡曰獻文皇帝廟  
號顯祖葬雲中金陵

獻文帝天安元年皇興五年即位六年

通志卷十五





總校官庶吉士臣侍朝

校對官檢討臣王坦修

謄錄監生臣程華